

**Trámite: certificación do acordo.**

Raimundo González Carballo, Concelleiro Secretario da Xunta de Goberno Local do Concello de Pontevedra.

**Certifico:** que a Xunta de Goberno Local do Concello de Pontevedra, na sesión ordinaria que tivo lugar o día 30.01.2023, adoptou, entre outros, o seguinte acordo:

**C) APROBACIÓN DAS BASES E CONVOCATORIA DE PREMIOS DO ENTROIDO 2023. 2023/SUBCC/000004.**

**I. ANTECEDENTES**

1. Pola Concelleira de Delegada de Patrimonio Municipal e Festas, se ordena iniciar o expediente que estableza unhas bases e convocatoria de premios aos participantes nos distintos concursos do Entroido desde ano 2023, que poidan ser de interese para a cidadanía de Pontevedra.

O Concello de Pontevedra establece esta convocatoria de premios co fin de preservar o patrimonio cultural e fomentar o interese polas actividades culturais e festivas tradicionais do municipio.

2.- En cumprimento da dita providencia, o servizo de cultura elaborou un proxecto de bases e convocatoria para a concesión de premios dos distintos concursos do Entroido. Así mesmo incorporas ao expediente, o informe do xefe de servizo xestor e, consonte co artigo 7.3 da Lei orgánica 2/2012 e base 51 das de execución do orzamento para o 2023, memoria económica relativa ao cumprimento dos principios de estabilidade orzamentaria e sustentabilidade financeira.

3.- Remitido o expediente á Intervención Xeral Municipal, fiscalízase o expediente de conformidade, facendo unha observación que ten a consideración de incumprimento esencial conforme á base 81.3 das BEP.

**II. CONSIDERACIÓNS XURÍDICAS:**

1.- O artigo 294 da Lei 5/1997, do 22 de xullo, de administración local de Galicia (LALG) no mesmo sentido que o artigo 23.1 do antigo Regulamento de Servizos das Corporacións Locais, Decreto de 17 de xuño de 1955 (RSCL), determina que poderán conceder subvencións e axudas de contido económico a entidades, organismos ou particulares cuxos servizos ou actividades complementen ou suplan aos atribuídos á competencia local.

2.- Os artigos 25.1 da Lei 7/1985, de 2 de abril, reguladora das bases de réxime local e 80.2 da Lei 5/1997, do 22 de xullo, de administración local de Galicia establecen que o municipio para a xestión dos seus intereses e no ámbito das súas competencias, pode promover toda clase de actividades e prestar cantos servizos públicos contribúan a satisfacer as necesidades e aspiracións da comunidade veciñal, nos termos da lexislación do Estado e das Comunidades Autónomas, entre outras, nas materias de promoción da cultura e na de ocupación do tempo libre.

3.- O artigo 30.7 da Lei 38/2003, do 17 de novembro, Xeral de Subvencións (LXS) establece que as subvencións que se concedan en atención á concorrencia dunha determinada situación no perceptor non requirirán outra xustificación que a acreditación, por calquera medio admisible en dereito, de dita situación previamente á concesión. No caso dos premios, e salvo que as bases reguladoras establezan outra cousa a xustificación consistirá na acreditación do feito de resultar gañador segundo se estableza na convocatoria.

4.- De conformidade co artigo 38 da Ordenanza xeral reguladora das subvencións (Título V. Bolsas ou premios), aprobada polo Pleno da Corporación o 17 de setembro de 2004 (BOP nº190 do 30/09/04), o réxime especial aplicable ao outorgamento de premios educativos, culturais, científicos ou de calquera outra natureza deberán axustarse ao contido desta ordenanza, agás naqueles aspectos nos que, pola especial natureza das subvencións, non resulte aplicable. Cando se trate de premios unicamente será necesario presentar a documentación esixida nas bases



específicas da convocatoria.

5.- Ao abeiro do establecido no artigo 3 da citada Ordenanza, son subvencións as disposicións dinerarias realizadas polo Concello para o desenvolvemento de proxectos, accións ou condutas que teñan por obxecto o fomento dunha actividade de titularidade pública ou interese social ou de promoción dunha finalidade pública, sempre que cumpran os requisitos previstos no citado precepto.

6.- Polo Servizo de Cultura elaboráronse as bases reguladoras da concesión destas axudas, axustadas á normativa local vixente neste eido, en concreto a Ordenanza xeral reguladora da concesión de subvencións do Concello de Pontevedra e os seus organismos autónomos, á que prestou aprobación definitiva o Pleno da Corporación na sesión que tivo lugar o 17 de setembro de 2004. O extracto da convocatoria será comunicada ao BOP pola Base de Datos Nacional de Subvencións nos termos e cos requisitos establecidos no art.20 da Lei 38/2003, xeral de subvencións.

7.- Aos premios destinarse un importe máximo de 37.250 €, correspondente á aplicación orzamentaria 09.3383.48100 do orzamento de gastos para o exercicio 2023. O libramento desta cantidade farase por medio da expedición da procedente orde de pago a xustificar, tal e como establece o art. 190 do TRLRFL, o artigo 69.1 do Real decreto 500/1990 e a base 63ª das de execución do orzamento prorrogado para o ano 2023, previa fiscalización da Intervención Xeral.

8.- A Intervención Xeral informou o 24.01.2023 o expediente de conformidade cun incumprimento esencial, consistente en que: “Non consta a aprobación do Plan estratéxico de subvencións (PES) para o 2023(....)”

Os plans estratéxicos de subvencións (PES en adiante) veñen regulados no artigo 8.1 da Lei 38/2003, xeral de subvencións, que establece que os órganos das administracións públicas deberán concretar nun plan estratéxico de subvencións os obxectivos e efectos que se pretenden coa súa aplicación, o prazo necesario para a súa consecución, os custos previsibles e as súas fontes de financiamento, supeditándose en todo caso ao cumprimento dos obxectivos de estabilidade orzamentaria.

O contido do PES ven determinado no Regulamento da LXS, aprobado por Real decreto 887/2006, de 17 de novembro. Segundo o artigo 12.3 do dito regulamento, os plans estratéxicos de subvencións teñen carácter programático e o seu contido non crea dereitos nin obrigas, establecendo que a súa efectividade quedará condicionada á posta en práctica das diferentes liñas de subvencións.

O anterior PES vixente ata o 31.12.2022, estableceu entre os seus contidos diversas liñas e obxectivos estratéxicos de subvencións, nas que se concretaba o plan de actuación. Así, a Liña estratéxica 5: Dinamización cultural, incluía a liña de subvención para a concesión dos premios do Entroido.

Rematada a súa vixencia, por decreto da alcaldía de 26.01.2023 acordouse o inicio do procedemento para a elaboración e aprobación do Plan Estratéxico de Subvencións do Concello de Pontevedra para o período 2023/2026, (expediente 2023/XENALC/000003).

Deste xeito, tense en conta o manifestado pola Intervención Xeral no seu informe e así, propónse ao órgano competente a inclusión no PES para o período 2023/2026, actualmente en tramitación, da liña de subvencións que regula os premios do Entroido, co fin de preservar o patrimonio cultural e fomentar unha tradición cultural e festiva importante no noso municipio.

9.- Segundo o artigo 11 da Ordenanza xeral de subvencións, a competencia para a concesión de subvencións en concorrencia competitiva cando o importe da convocatoria exceda de 12.020,24 euros correspóndelle á Xunta de Goberno Local.

En base ao exposto, unha vez informada a existencia de crédito pola Oficina de xestión orzamentaria e contabilidade e tida en conta a observación manifestada pola Intervención Xeral municipal, que informa o expediente de conformidade, a Xunta de Goberno Local, por unanimidade, acorda:



Primeiro.- Incluir no PES para o período 2023/2026, en tramitación, a liña estratéxica de subvencións para os premios do Entroido, co obxectivo de preservar o patrimonio cultural e fomentar o interese polas actividades festivas tradicionais do municipio.

Segundo.- Aprobar as bases e a convocatoria e pública dos premios do Entroido 2023 do Concello de Pontevedra contidas no documento co CSV JVTA97D8ST53EQRL.

Terceiro.- Autorizar e aprobar o gasto por importe de 37.250 € con cargo á aplicación orzamentaria 09/3383/48100 e operación contable 12023000004403, do exercicio vixente, cantidade que se librará por medio da expedición da procedente orde de pago a xustificar.

E para que conste, coa salvidade á que se refire o artigo 206 do Regulamento de Organización, Funcionamento e Réxime Xurídico das Entidades Locais, expido a presente certificación de orde e co visto e praxe da Alcaldía na data que consta na sinatura electrónica.

